

PCN a bishitá Sint Eustatius pa papia tokante invershon na e isla

Oranjestad- Miebronan di direktiva di PCN Roy Hooker i Harald Linkels resientemente tabata di bishita na St. Eustatius, na unda nan a papia tokante posibel invershonnan na e isla. PCN ta sondeando di forma aktivo den kiko e por invertí na Boneiru, Sint Eustatius i Saba. E bishita na St. Eustatius tambe a tuma lugá den e kuadro ei.

Na St. Eustatius Linkels i Hooker a papia ku en total 6 diferente partido ku lo ke hasi invershon na e isla, ku fondonan di PCN. Presidente di e fondo di penshun, Harald Linkels a bisa: "Nos a keda sorprendé di forma agradabel pa tur e interes ku tin na Statia pa invertí ku fondonan ku PCN lo por tin disponibel. E balor total di proyektonan riba kual nos a papia ta surpasá un montante di 30 mion dolar".

Segun Linkels ta splika e 30 mion dolar aki ta mas di loke PCN su so por finansiá. "Sin embargo, huntu ku otro fondonan di penshun, ku kual nos ta traha huntu den e asosashon di fondonan di pensun Karibense Hulandes (CaPAs), nos ta sigur ku nos por logra finansiamentu di e magnitud aki.

Linkels a sigui bisa ku Roy Hooker ku su mes persona a keda tambe impreshoná pa e kalidat i kantidat di tur e proyektonan pendiente na St. Eustatius. "Si bo wak e kantidat di plan i posibel invershonannan relativamente grandi, kos ta mustra prometedor pa e isla, ora ta papia di desaroyo ekonómiko", asina Linkels a bisa.

Segun e presidente di PCN, e fondo ta primeramente interesá pa invertí den proyektonan ku ta relevante pa e 3 islanan di Boneiru, St. Eustatius i Sba. Esaki por ta kosnan ku ta pone ekonomia krese, pero tambe kos ku ta yuda mehorá kalidat di bida di nos hendenan. Nos por pensa riba proyektonan di infrastruktura, pero tambe protekshon di nos patrimonio nashonal, ora ta trata di edifisionan histórikamente importante.

Komo fondo di penshun, Linkels a sigui splika, ta importante si pa e fondo por hasi un rendimentu atraktivo riba plaka ku e ta fia na proyekto, pa e kapital di e fondo por sigui krese.

Hooker i Linkels durante nan bishita a hiba tambe un bishita di kortesia na komisario di Gobierno Sentral, Mike Franco, ku ken ta tin un interkambio interesante riba e diferente proyekto ku tin pendiente na St. Eustatius.